

四庫全書

集部

欽定四庫全書

集部

夷白齋稿卷一
一至四

詳校官中書臣孫衡

中書臣劉源溥覆勘

總校官編修臣王燕緒

校對官待詔臣胡士震

謄錄監生臣令狐慕蜀

欽定四庫全書

集部五

夷白齋稿

別集類四元

提要

臣等謹案夷白齋稿三十五卷外集二卷元

陳基撰基字敬初臨海人受業黃潛之門所作詩文皆操縱馳騁而自有雍容揖讓之度能不失其師傳至正中以薦授經筵檢討嘗為人草諫章幾獲罪引避歸張士誠據吳引

為學士書檄多出其手明興太祖召修元史
賜金而還明史文苑傳附見趙塘傳中基寓
舍有夷白齋故以名其稿凡內集詩十一卷
文二十四卷外集詩文合一卷大抵皆元世
所作也朱存理樓居雜著有跋夷白齋稿一
篇稱得鈔本于王東郭家臨寫一部計二百
九十六番裝為五冊而不言其卷數又有跋
夷白齋拾遺一篇稱尚寶李公前修郡乘時

先得海虞人家本一冊復有遺文三十五篇
予悉錄之今得王氏本相校異同于海虞本
錄出為拾遺一卷吳中尤氏有遺墨數紙內
有陳基傳謝徽詩併存拾遺後云云據其所
言頗與今本相近然存理但云拾遺為遺文
而此本外集有詩或後人又有所更定與乾
隆四十六年十一月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

夷白齋稿卷一

元 陳基 撰

賦

一 別知賦送王子充

紛吾好茲良友兮慮無遠之不求匪夫人之不衆兮繫
惟愛予之好修迪仁義以為途兮挾忠信以為翰朝縱
鞅于齊魯之郊兮夕沿洄于洙泗之流登泰華以望八

荒兮薄青冥而上游扶雲漢而分天章兮將黼黻乎皇猷虎豹怒而當關兮呌帝閭而無繇出國門而南騫兮逝將反于故丘曰國家之取士兮蓋亦有夫常度策駮耳而駕輕車兮矧從容於熟路秋風起而江水波兮歲月聿其云暮鴻羽用而為儀兮廓雲達而軒翥蹇予生之子子兮何涉世之孔囂馳子乘於九衢兮太行割其在於前豈王良之不善御兮反子躬之或愆昔退之之魁杰兮感二鳥於潼關汨於蹇蹇而無類兮又何足以永

嘆屬伊人之遠別兮申一言以自勗倘夙好之不替兮
尚候子於空谷

蟬賦

笠澤之野夏無鳴蟬嘉禾蔚其如雲衆鳥雜而爭喧維
歲行之在卯景風生于樹顛爰抱葉以高噪復憑虛而
浩嘆赫乎對趙盾之日懷焉訴齊女之冤蓋非金而非
石亦非管而非絃變化乘乎氣候音奏發乎自然初而
聽之若流泉之含清風瀉疾瀨而為湍徐而察之如靈

絲之抽獨繭引餘緒之綿綿若乃微雨乍止涼颼滿園
陽舒陰伏雲開日鮮擇修幹以仰集盼柔柯以延綠或
嚶嚶而漸厲或琅琅而未闌曉咽碧梧之露夕唵琪樹
之烟興玉署之秋懷警金閨之晝眠韻欲斷而復續咏
欲然而忽宣將自鳴其不平意有蓄而莫傳者乎蓋萬
物蠕動品異類殊維爾蟬之為物何賦形之眇如始並
育于污濁卒獨慕夫清虛聊含氣而飲露曾不豐而不
腴奚斧蟲之稔毒恒不利于爾軀豈文忌太著爾首綏

飾分物忌太廉爾不黍食兮居忌太儉爾不巢息兮衆
忌太信爾守不忒兮性忌太潔爾蛻無跡兮嗟乎爾有
五德又復善鳴激中外之逸響振寥廓之餘音縱有愜
于人耳寧無逆于物情爾其謝高枝于靈囿托茂樹于
郊坰藉流暉于叢薄蔭清樾于廣庭予以安貞而養素
予以遠害而全生然周詩咏其應時漢冠尚其能介集
井則前史徵祥偷安則昔人垂戒進則揚夫聲名退則
游于塵外雖隱見之有時亦行藏之無悔也

樂府

白雁操

梁君出獵其臣公孫襲善其君之聽其言而
作

有羣白雁王其弋諸蠢彼行者王其釋諸匪伊是釋惟
王之德王德伊何曰齊景公一言之善上格帝衷人獵
得獸于言何有王獵得言王千萬年

鴻鵠操

晉平公浮于西河感舟人固桑好士之言而

作

鴻鵠于飛以翮非毳君子好士宜別其類鵠蜚冲天其
有以夫美哉山河守以士夫孰謂彼夫言有旨夫

崇丘寄倪元鎮

丘崇崇兮下有流水樹森森兮匪櫟伊梓彼櫟孽兮且
壽梓葉為薪兮于材何有造物孔仁兮將焉歸咎

山高與陸玄素

謂山高兮其上有天謂地厚兮其下有泉天不可升兮
地不可極我思古人兮為之太息古之人兮謂誰山之
中兮水之湄孤舟兮容與俯狎步兵兮仰招鷓鴣夷非夫
人兮爾曷從之

春草詞為華彥氏賦

當軒不栽花只種忘憂草栽花恐傷春草根草色年年
為親好東方日出芳菲菲堂上阿婆堂下兒兒來為尋
阿婆喜何事遠游千萬里春草種易生春暉報難極不

將春草報春暉且著春衣舞春日舞春日樂未央阿婆
壽與春日長教人愛殺雙蝴蝶歲歲飛來入畫堂

雁孤飛為徐夫人作

雁孤飛在何所一在江之南一在江之澣江南一去不
見歸河水悠悠自東注結髮從君作夫婦豈料孤飛失
儔侶夫為忠臣妾貞女忍昔聞之今自許我欲同歸泉
下土翼下之鳥誰與哺日暮不離河之洲日出飛飛愛
毛羽毛羽幸無增繳傷翼下之雛乃可防

慈烏曲為沈仲說作

慈烏尾畢逋朝夕相呼哺爾雛今日慈烏一何樂飛向
樹頭及屋角飛去飛來鳴且啄門前忽有吏手捧篚與
筐中有兩束帛爛灼生天光孫也出見吏再拜升母堂
祖母康強年九十受帛拜天仰天立太平恩澤高年及
懽樂盈門動鄉邑殷勤裁剪製為衣長短稱身喜相宜
母著衣孫起舞日日見烏來反哺萬歲千秋祝明主

黃雀行

黃雀何飛飛雄鳴呼雌野草隈暮歸莫向空城棲空城
挾彈多小兒朝飛莫傍東家屋東家鷲鳥思爾肉不信
請看梁上燕昨日養雛今不見不信再看桑間雉綺翼
襍穢爪中死東家公子非少恩彼鷲不仁徒爾嗔吁嗟
爾生亦甚微彼鷲不仁謹避之

鷲鳧行

鷲與鳧皆穀育鳧愛水游鷲愛陸鳧昔未辨雌與雄母
不顧之鷲為伏鷲渴不飲飢不啄以腹抱卵誰敢觸鳧

脫殼鷄鼓翼日日庭中覓黍稷啄啄呼鳧使之食鳧羽
日離襪一朝下水不顧鷄鷄在岸鳧在水賦性本殊徒
爾耳鷄知為母不知鳧恨不隨波共生死

白頭公詞

杜陵三月春風暖燕語鶯啼雜絃管落花繚繞紫駟嘶
游冶歸來杯中滿雨棘風篁忽已秋幽鳥多情亦白頭
不隨翡翠樓中宿却愛鴛鴦水上浮春去秋來不覺老
憂患偏多安樂少綺窓深處語言微紛紛付與秦吉了

刈草行

原上秋風吹百草半青半黃色枯槁城頭日出光杲杲
腰鎌曉踏城門道城外草多露未晞爾鎌利鈍爾自知
一人刈草一馬肥馬不肥兮人受咎城中官馬幾多匹
一匹日喂草幾束

新城行

舊城城舊人民新新城城新無舊人舊城城外兵一解
新城城中齊蓋瓦鴛瓦如鱗次第勻軍中令嚴鷄犬寧

將軍愛民如愛子百賈皆集新城市
浙米淮鹽兩相直
楚人之弓楚人得何日四海無荆棘
北賈販南南販北

見月行

在家見月明誰問圓與缺
他鄉見月明却驚虧又盈
世間兒女不知愁
夜夜月明同上樓
那知此夕遙相望
樓上徘徊增惆悵
人生願與月同圓
不願別離年復年
此身總為利名逼
奔走東西與南北
他鄉見月與家同
慟哭亦無阮嗣宗

裁衣曲

殷勤織紈綺寸寸成文理裁作遠人衣縫之不敢遲裁
衣不怕剪刀寒寄遠惟憂行路難臨裁更憶身長短只
恐邊城衣帶緩銀燈照壁忽垂花萬一衣成人到家

征夫嘆

世上父母心貴男不貴女生女長大內夫家生男可以
當門戶東家有女不嫁夫夜夜織紡輸官租西家有男
雖娶婦歲歲從軍身荷戈有夫不若無夫樂無婦豈知

金瓶梅詞話卷一
有婦惡却羨林間小鳥飛
鷓鴣雄頰頰不暫離

征婦怨

征人娶征婦誓將同甘苦
征婦嫁征夫心期事舅姑
舅姑在堂夫遠戍欲寄征衣
不知處裁衣不寄恐夫寒
有婦容易無夫難人生莫作
征人婦夜夜孤檠淚如雨

邊城曲

莫啟匣中鏡怕見頭上雪
莫放弦上箭怕射邊城月
邊城有城月缺還再圓
頭上髮白不復玄君不見
自古邊城有

餘樂夜月聯詩畫舞榭至今月照鄆城頭將相功名齊
斗牛

夷白齋稿卷一

欽定四庫全書

夷白齋稿卷二

元 陳基 撰

古詩四言

九月壽沈母

十年九月廿有九日沈氏大母為年九十歲事告成登
黍與稷孫進裳衣婦具酒食母衣維何天子賜帛母食
維何伊帝之力母升于堂朝日有光崇肴于俎實酒于

觴孫拜起舞婦與在行酒旨肴嘉母樂且康中堂何有
有絲有竹琴瑟管籥繁音妙曲間以金石鏘之佩玉黃
耆鮐背維母是祝載彈載詠再歌再絃母醉且飽母喜
且言母曰孫孝母曰婦賢宜爾蠶于室宜爾穀于田爾
孫爾婦式如母之年

西村之墅美德方甫

西村之墅有稷有黍誰其藝之維德方甫維甫在穎式
田以處入奉烝嘗出具樽俎以歆我祖考以侑我賓侶

潁水悠悠載泳載游或杭以葦或方以舟或汎幽渚或
浮中流以御我田祖以貽我麋麇甫之出矣載縻好爵
聖亦有言耕不如學人情為田有耨斯穫以詒我後昆
以承我先覺

古詩五言

秋懷

寒暑有代謝人事亦推移蹉跎慨疇昔俛仰今復茲籬
落萎秋蔓餘葩含夕姿造物諒難窮吾生知有涯皎皎

卷二
碧山阿依依芳桂枝相從恐遲暮悵望起遐思

其二

梧桐墮金井寒螿泣露叢離居千里外一夕生秋風秋
風忽已暮離索邈何處獨寐在重幃相從乃中路

其三

秋夜何迢迢迢迢不能寐起坐彈孤琴聊寫千古意鳴
鳳久寂寥猗蘭亦憔悴往聖既莫作後賢孰為繼獨憐
商山翁去去復遐逝空谷亦何有紫芝且可餌如何末

路中亦墮留侯計羽翼倘不成鴻鵠恐垂翅苟可利生
民寧辭暫紆轡區區後世名于翁何足計

其四

秋水不可涉美人安得從眷彼芙蓉花盈盈秋水中非
無舟與楫所畏有蛟龍臨流不能採零落委芳叢

其五

羣動夜已息秋聲來何從仰視天宇高微雲邈無蹤明
月在庭戶河漢上縱橫既莫知所始何由究其終我獨

卷二
絃我琴微風入疎桐寫作清商調感慨意無窮

其六

昨日苦炎暑端居厭煩渴手短河漢高井深轆轤折此
夕秋已清一洗塵世熱紈扇委深筍輕羅換疏葛天運
無停機人生自悲悅急景一為遷流芳遂衰歇洞庭生
微波明河湛秋月落葉辭故枝驚鴻亦飄忽為謝同心
友胡為久離別

其七

我有一樽酒獨酌不成懽豈無骨月親悠悠隔河山亦
有同心友合併良獨難古人千載上世遠不可攀何如
與明月徘徊松桂間月既知愛我流輝照衰顏我亦知
愛月托心同歲寒長願玉宇淨河漢生微瀾四海仰餘
照親友各平安夜夜見明月人人無苦難此月不可負
此樽不可乾天地等逆旅年華若驚湍古人雖云遠其
言美芝蘭舉觴以和之對月更盤桓

讀國語

成周昔重幣欲以母權子用以實府藏為計無乃鄙塞
川以為潢川竭潢亦毀至哉單穆公論列一何偉當世
不見用後王宜鑒此厲王怒聞謗乃使衛巫監欲逞一
已私冀彼萬口箝防民甚防川川壅宜早決民言苟不
宣禍至恐為烈先王置謗木慮政有缺佚瞽史與矇叟
賦誦左右規百工及庶人人賤言不廢聖亦擇葛藟賢
當聽耆艾

詠史

百金購馬骨為計良已疎如何不歲間一至三馬俱燕
昭亦中主謀國乃不愚一聽郭隗言虛心闡良圖黃金
築高臺束帛走中區瑤房間瑤館窈窕貯名姝五鼎列
珍饌駟馬駕華車今年迎樂毅明歲迓由余秦城百二
險六國日丘墟燕小獨後亡得士諒非虛

昔者智襄子獨擅六晉彊一舉滅范氏再舉圍晉陽韓
魏為執轡意氣何揚揚以水灌人邑自負莫能當誰知
不旋踵身死國遂亡恃力不務德覆滅乃其常

吾憐晉陽圍沈竈且產龜不沒僅三板民志卒無他乃
知繭絲利不如保障多邯鄲非不實民膏鬱峩峩走遠
不趨近君子意無那先王有所屬尹慈與民和智氏不
好德獨奈晉陽何

懷美人次友人韻

出門日初昕入門日已陰懷彼千載人勞我一寸心歲
月忽云邁江湖一何深北度限太行南游阻桂林既負
慷慨懷肯羨詭遇禽取此獨繭絲中有太古音寫作梁

甫調嘆息淚沾襟

待王子充不至

屏跡遠城闕幽棲向林阿永懷同心友褰衣起婆娑憶
昨走京邑彌年阻關河結客燕趙間頗覺增悲歌逸驥
卸羈紲冥鴻辭網羅所念聖哲遠中心覺無那夏屋廡
嘉木芳池發新荷須君此弭節日夕共委蛇

夏日喜友見訪

兀兀少寤語悠悠多遠懷斂跡昉初夏凝神企心齋美

人忽至止良友與之偕閒然類逃虛楚爾觀所蹟跡適
志彌愜情敦禮無乖衣褐貴懷璧屬辭慚類俳積雨霽
初夕清飈掃餘霾願言念幽獨日此憇高懷

投贈同志

仲夏暑氣溽平居愛高明奈此西日炎四壁鬱如蒸鳥
雀亦苦熱羣飛繞簷楹念彼縞衣侶引吭一長鳴諒非
丘樊姿緬懷霄漢情高槐蔚成幄稍稍清風生嘉卉亦
自媚為我顏色頰攬物感時序興言搖心旌美人一水

間累日廢逢迎投此以贈之聊復慰屏營

次呂彥貞韻

衛國不好士養鶴皆乘軒夏禹后之聖匍匐拜昌言我
我十二樓上有孤鳳騫覽德一下之顧肯栖于樊世無
侗儻人嗟此復誰論洪河西北來萬里日趨奔學海有
源委詎勉宜自敦况有典型在共此北海尊

分省同幕諸公小集

日出諸公館眷言欲何為名法非素習吏牘漫紛披况

當兵戈際生民屬瘡痍愧非適時器徒蒙君子知今夕
復何夕羣彥辱追隨繫馬及亭午開軒納涼颺須臾急
雨至四座却莆葵呼吸異舒慘俯仰閱盈虧舉杯酌芳
醪聊以慰哀遲知己諒難酬厚顏祇忸怩

梅南書隱為上虞俞氏賦

草木本無心人情殊所托豈伊臭味同政爾高風格眷
彼東山陞貞葩爛林壑攬此亦奚為幽栖遠城郭玉立
衆芳先氣壓羣卉弱詒謀豈無意迂續斯有覺圖書目

前陳琴瑟時間作寤寐賢聖俱起坐塵全却故俗仰堯
封名山餘禹鑿擬賦歲寒詩莫負花前約

夏日齋居用蔡彥文韻

微生一世間俯仰異今昨嘯傲羲軒際慷慨孫吳畧趨
舍雖或殊浮薄得無怍含靈屬憔悴畏途乃盤錯視天
河漢高涉海波濤惡三徑日蕭蕭五湖烟漠漠浩蕩魚
鳥適偃蹇騏驎縛衆卉萋更碧孤芳萎已落動植迭榮
悴崇深遂飛躍自得靜中趣却慕方外樂况非軒冕姿

謬膺菲葑托已與向平期終赴名山約

分省早集懷同志諸公

間歲涉戎旅終年遠丘壑一為塵網嬰竟負烟霞約今
日適公署時暑秋已薄山翠落簷楹湖光映簾幙同袍
二三侶分攜異今昨畏途屬賢勞端居念離索蹉跎愧
衰暮龜勉叅畫諾臨事每參差憂時空謇諤覽茲山水
勝寫我情緒惡遲子蚤旋歸開醒共斟酌

樓居

樓居屬朱夏宴寢宜清晝微雨散空靄遙峰獻餘秀深
巷頗紆轍良朋亦時覲尚論黃虞前足以發蒙陋何當
稅塵鞅遠跡栖雲岫為謝荷鋤翁遲種南山豆

彥文點兵餘杭富陽賦詩見示因次其韻四首
出門難行路四郊人跡疏畏虎如畏賊餐米如餐珠驅
車候明發點兵歷邊隅誓將殄妖氛聞者喜復歔誰能
行伍間奮身先萬夫

使者有所適陸行復乘舟迢迢餘杭道泛泛富陽流盡

瘁乃明訓宴安匪良謀不貴徇名祿所期無悔尤自古
君臣際同樂必同憂

天高河漢秋月白風露涼引弓激長矢願言射天狼仰
天叱熒惑却立麾欃槍誓將七尺軀為此百夫防孤忠
一以奮萬死庸何傷

生民苦塗炭羣妖方弄兵大將肅旗鼓三軍嚴視聽所
重奉天討慎勿妨農耕鯨鯢示兩觀熊虎行四征努力
平南服以之答聖明

分署望鳳凰山

秋氣日以佳微雲不成雨青山天際來與我為賓主飛
龍及舞鳳突兀在庭戶須臾霧靄收草樹繁堪數蹇予
麋鹿姿詎意嬰圭組蹙縮累天真驅馳漫塵土偶坐屬
無喧晴空湛空宇欲去復徘徊此意當誰與

西齋對雨次彥文韻

江雨水雲國陰晴無定期靡靡歲將晏悠悠夜何其驚
聽一以勁落葉漫紛披人情異舒慘物運互推移君子

懷端居玄覽久忘疲客至即共飲酒行勿停卮奕勝不
取速句巧寧厭遲霜橙眩餘綠秋菊含晚姿豈不念儔
侶日夕共委蛇所覲葆冲和勿復費幽思

池上

空池約光景皎皎無緇穢性潔不容滓體虛能照人古
人以水鑑鑑心不遺身所以解纓侶亦欲濯其塵纓解
復可結塵污不可清凝觀池上者當知清濁音

對菊

我有舊栽菊蕪穢北山隅
竭來三十載誰復護根株
非但歲月久况茲川路殊
憶昔少壯時親愛日懽娛
每逢佳節至掇英汎樽壺
持杯送飛鳥飲畢卧蓮蔭
今晨屬遲暮目斷歸雲孤
終然嗜真實時復過君廬

送邵同知分韻得來字

我折錢塘柳君上越王臺
越臺今寂寞昔人安在哉
空餘鏡湖水蕩漾小蓬萊
千巖雨新霽萬壑淨無埃
山色時時好荷花面面開
流芳殊未歇爛漫待君來

次韻沈仲說答蔣子忠遺山水便面詩

端居宴修景尚論天人際
紈扇遠寄將咫尺山水麗
出入懷袖中盈盈落空翠
樂此虞舜琴傲彼羲皇世
穆如來清風妙與天者契

夷白齋稿卷二

欽定四庫全書

夷白齋稿卷三

元 陳基 撰

古詩五言

發吳門

少壯不解武衰老却從軍將相北出師部伍各駿奔伐
鼓震城闐麾羽隱秋旻水師歛龍驤鐵騎紛雲屯軍容
亦已肅士氣悉欲伸載詠東山什感激為逡巡顧余麋

鹿姿辱忝羆虎羣頽然介冑間見此逢掖臣微祿不逮
養匪材何足珍馳驅寵辱途俯仰愧君親秋風吹海濤
落葉滿江津去去勿踟躕浩歌天宇新

大江

夏后導九州江源起西極想當䟽鑿時毫髮無餘力奔
流赴東海吐納潮與汐萬古天塹雄洶涌限南北時秋
八月望烟霧四開闢皓月麗中天華星列東壁俯擊亂
流楫仰送搏風翮眼空牛渚舟氣傲南樓席平生臨深

戒所至每兢惕此夕獨踈狂四顧無與敵風伯引輕帆
百怪咸辟易前瞻狼五山亭亭倚秋碧

狼山

狼山一何竒崛起大江滸橫截捍奔濤森立成四五人
言秦皇帝鞭石走中土意欲誇東溟候彼神仙侶此石
乃其遺為山儼狼顧斯事雖云誕傳說自前古我疑融
結初磅礴元氣聚地脉引東南歛吸不可覩層巔屹浮
圖下瞰吳岫雨行行入淮甸此勝無與伍

通州

渡江潮始平入港濤已落泊舟狼山下遠望通州郭前行二舍餘四野何漠漠近郭三五家慘淡帶藜藿到州日停午餘暑秋更虐市井復喧囂民風雜南朔地雖江淮裔俗有魚鹽樂如何墟里間生事復蕭索原隰廢不治城邑僅可托良由兵興久羽檄日交錯水陸輓粟芻舟車互聯絡生者負戈矛死者填溝壑雖有老弱存不克躬錢鏐我軍實王師耕戰並宜作惟仁能養民惟善

能去惡上官非不明下吏或罔覺每觀理亂原愧乏匡
濟畧撫時一興慨悲風動寥廓

如臯縣

曉行過如臯草露淒以白井邑無人烟原野有秋色緇
褐兩三人牢落徒四壁似訝官軍至拱立衢路側伊昔
淮海取土俗勤稼穡瀉滴盡桑麻閭閉咸貨殖及茲兵
燹餘道路紛荆棘十室九逃亡一顧三嘆息王師重拯
亂主將加隱惻戒吏剪蒿萊分曹理鹽筴眷言恤瘡痍

遲迴歷阡陌上天合助順九土期再闢白首忝戎行臨
風增感激

海安

淮海水為利轉運有常程積渠如積金守防如守城通
聞渠堤壞水決如建瓴我軍賴神速僇力障頰傾舊防
幸已復新隄亦宜興古人慎舉衆日費動千金克敵務
充糧足邊資力耕矧茲淮甸間沃野富吳荆草萊日加
闢餽餉歲彌增勿使土遺利坐令儲峙盈東南利可舒

根本計非輕欲弘中興治斯事力當行陋儒無長筭觸
事有深情冉冉趨畏途戚戚慎宵征

爛泥洪

猛虎尚可搏蛟龍亦易屠惟此爛泥洪
蟲蟲天下無蚊
嘴甚蝎螫蝨聲殷雷如壯士不敢觸觸之無完膚一噉
始筋露再噉令骨枯牛馬噉致死矧茲
此者軀造物仁
萬物稔此獨奚為得非庶草蕪變化劇
蜂虻如蟻與
虱所貴日爬梳否則必滋蔓蔓草古難除
我欲訴真宰

憤切擬包胥上天必震怒下令墮天誅
尊收將中軍風伯為前驅一鼓清八極
斯醜安可逋爾蟲法必殲爾洪理難
潛聽氓秉耒耜庶草悉誅鋤要令衆
蚘都化為杭稻區作貢奉明禋庶足
散錙銖

秦州

吳陵古名邦利盡揚州域舊城雖丘墟
新城如鐵石昔為魚鹽聚今為用武國
地經百戰餘士恥一夫敵征人還舊鄉
下馬問親戚躑躅慨蒿藜徘徊認阡陌
桓桓霍

將軍出入光百辟位高言益謙功多志彌抑誓欲報仇
讐不肯懷第宅人羨到家榮驚喜爭太息白日照旌旗
閭里有顏色皓首太玄經雖勤有何益

上樂

夕次秦州郭朝行上樂里密雨洒蒹葭秋風拂菰米頗
閭承平日魚鹽賤如水蕭鼓鬧叢祠謳歌喧城里中原
正格鬪擊柝聞四鄙官道日萋蕪生人埒螻螿依依烟
際舟兩兩舟中子來往賣魚蝦出入官軍裡生長亂離

間不識紉與綺適爾見王師被服多華侈買物不計錢
僕僕更拜起何當息戰伐萬國收戎壘山河歸帶礪車
書復文軌有地盡桑麻無人不冠履腐儒亦何需歸山
守松梓擊壤樂餘年此樂無窮已

令丁鎮

水路由下樂前赴令丁鎮落日淡平蕪荒村帶寒燐囊
時富魚鹽稅薄民不困蓮芡每時豐亦足濟饑饉江湖
歲忽艱老弱行蠢蠢相攜就食淮不能辭遠近四野今

盡蕪百畝無一壟鞠為鳧雁區無復限封畛師行錙重
隨士飽筋力奮經費固有常變通亦宜論吾聞古賢將
羊陸開吳晉食足備邊儲高標邈千仞

務子角

頻歲事行役敢云筋力衰官軍渡淮海父老逐旌旗騎
士盡驅虎舟師皆水犀踴躍赴敵場謳歌雜華夷行行
負子角舉目悉瘡痍草木未黃落風露已淒其僕夫踈
我前歲暮無寒衣故鄉日以遠道路且崎嶇我方戒徒

侶師行有程期貴賤皆賢勞
惶敢恤其私賴有同袍
彥論議皆瓌竒有酒即共飲
聊復慰仳離

高郵

秦郵水為國層城高鬱鬱
三面阻重湖深湟中蕩滴
每憐秦太虛材兼文武術
慷慨談孫吳議論甚竒崛
遨遊二蘇間文采尤駿發
平生英邁氣想像見彷彿
顧余亦何知通勉從行役
歲晚過其鄉徘徊為終日
憶昔元祐間中國久寧謐
西北獨披猖公心嘗憤切
中原羅塗炭

郊野多白骨使公當此時豈惜焦毛髮秋風吹淮甸征
騎四馳突九原不可作悲歌徒蕭瑟

寶應

秋風日蕭颯百草各憔悴零露泣寒螿客子心欲碎寶
應古名邑喪亂生聚廢市井皆官軍道路盡蕭艾主將
行邊鄙遺黎望旌旆共願早休兵還鄉供負米

述老嫗語

歲暮涉淮海不辭行路難從軍豈不樂即事每長嘆老

嫗八十餘日晡未朝餐泣云遭亂離零落塗路間豈無
子與孫充戍皆不還男戰陷賊陣孫苦隔河山數月無
消息安能顧饑寒語畢雙淚垂使我心悲酸上天未悔
禍豺虎方搆患近聞山東變世路復多端悠悠顛躓人
何時得平安

淮安

此邦云楚州水陸居四達因淮以為塹天險不可越昔
聞里中人功蓋天下傑能受市井辱差與絳灌列常憐

躡足時事與追亡別走鹿既已擒狡兔安足恤疾風吹
空郊露下芳草歇行過進食地尚想還鄉日王孫迹已
陳漂母名未滅遙望濟岱間風塵正騷屑

九日從陳醫師寓得甘井命童子汲之

世亂遠為客迢迢淮海濱空城百戰餘多非舊人民十
井無一甘憂心渴生塵蕭條值九日無酒亦無親偶過
同宗友欸笑意何真為我修茗事芳潔無與隣一啜喉
吻潤再啜肺腑清三啜衆體和四啜百慮澄連啜五至

六高談如有神吾宗和扁流豈遇蘇耽倫得非上池水
沾溉及時人呼童抱瓶盞走汲勿辭勤飢餐與渴飲他
井棄勿論澤我枯槁客滋我衰病身沃我冰炭腸餘潤
及友賓古人飲菊水其壽及千春今余遇菊日飲此樂
欣欣裁詩謝知己勿以饗見嗔

傷菊

終歲事行役所歷厭蒿蓬偶過衛子廬庭有芳菊叢淮
海風日高秋葩粲黃中擺落凡近態綽有高遠風自負

丈人行肯為兒女容卓然搖落際見茲羣卉雄是時歲
將宴不意有此逢繼繼去復回眷若情愛鍾衛子屬他
適我亦希過從居停既易主庭菊廢無蹤鞠為鷄承區
腥穢多蛆蟲見之長太息挹腕為忡忡爾菊雖植物正
色映霜空氣含逸世韻力著扶衰功托根君子庭願言
期始終中道乃改步殘賊遘屯凶物理有屈伸世故無
終窮悲傷亦何益極目送飛鴻

夷白齋稿卷三

欽定四庫全書

夷白齋稿卷四

元 陳基 撰

古詩五言

公退述懷

雞鳴戒徒御日入反柴荆素無希世念亦復勞其形間
關用武日百役有期程空言不克用退省汗沾襟中衢
積泥潦滑滑不堪行振轡策羸馬一步一凌兢入門無

他慮偃卧就南楹永愧逃名侶冥栖無所營

成夫修所居室成戲贈

我昨戾東楚君方客中吳我至已授館君來始營居我
屋雖秋隘可以置琴書並軒五六尺種菊三四枝公退
即安息或擬陶潛徒君居擇高廠塗墍加蘆蔭背陰而
面陽中密而外踈聞昔真如室八寶羅明珠天女散妙
花綽約麗且姝今欲人其人必且廬其廬去草當去根
愛屋庸愛烏我器若鉛刀僅堪一割需君材如太阿可

制千於菟利鈍迥不侔趨舍宜爾殊雖居市廛內各在
東西隅朝游或同幕暮歸仍異途終然念羈旅時復枉
軒車摘我黃金英浮君白玉卮議論天人際笑傲羲皇
初麴生有妙理不飲待何如

次韻答趙本初

肅肅霜露下蕭蕭鴻雁征春從越城戍秋復淮甸行解
却紫霞珮換得曼胡纓冀酬一飯德違惜千載名新詩
辱遠寄金石鏗有聲欲報之瓊瑤臨風空致情

海安過插得風出爛泥洪

舟過海安插路由爛泥洪水行九十里洪潏溯秦潼月
黑星漢高四顧無人蹤縱有百尺緯不如數尺蓬仰視
天宇濶餘霞散晴空篙師無他技扶楫呼南風夜半水
鳥鳴出沒西復東其聲類人嘔聞之思挽弓人心皆駭
異莫知吉與凶得非卑濕區窳池蚊蚋鍾暑夕啞人膚
蠶蝎尚可容此鳥名蚊母鼓翅利於蜂往往陂澤內雌
者呼其雄春氣一以和托巢蘆葦叢此鳥信可憎彼蚊

幸未逢所憂亡命徒持刃匿草中晝伏夜間伺為毒甚
斯蟲我方事師旅禁暴哀人窮此輩若不除厲民安有
終諄諭飭吏卒反覆開盲聾爾實備官守責在兵與農
自古處邊圉盜戢商旅通陽德始發生人事宜肅雍簡
書雖有程我行憂慮忡歎息行路難何由辭轉蓬

聽水調歌有感

江流清復清江草接江亭何人歌水調餘韻入青冥歌
者不知苦聽者難為情坐令離別客白髮鏡中生

翠雨亭

華構帶修竹窈窕清湖潄時雨滴空翠綺疎生晝陰飛
蓋集芳侶鳴珂集春禽中有孤栖鳳懷哉多好音

下塘道中

謝村

舟行謝村路却訪義橋營妖骨埋荒草秋風洗復腥青
山不改色紅樹似含情當日聞風鶴俱疑是晉兵

塘西

牽舟復搖櫓日出將停午風遮五林秋雲挾塘西雨盈
盈採蓮漿坎坎迎神鼓對此欲忘歸停橈且容與

東阡

喧呼東阡道倉皇競明發萬斧入中林千夫編巨筏關
山日憔悴世路增騷屑此物諒何尤徒以材見伐

南澗

昔年荷葉浦椎剝伏蒲萑日月相狙伺承平為禍患茲
辰乃夷坦悉歸耕釣間但聞明月夜時唱採蓮還

中塘道中

鳳口

溪塢晚寒風山營夜依谷
栖鳥息復驚歸雲斷還續
畫舸上宵征連艦銜尾宿
戍鼓雜鳴笳軍聲一何肅

東塘

輕舸下溪口却轉東塘路
雞犬近相聞漁樵遠城市
雖經兵荒後漸有承平意
處處白蘋花家家紅槿樹

大麻

大小兩麻村中藏萬家
樹連遙山雲草滴茅亭雨
地利本宜農民風乃尚武
欲問漢文翁何時復淳古

包家堰

依依楊柳津靡靡包家堰
水出鳳溪口山簷臨平地
經兵燹餘人似官軍健
往歲羽書頻今年魚米賤

上塘道中

尹山

人傳周吉甫遺墓在勾吳
蕭條入墟里決泮帶烟蕪
豈

伊姬臣裔散落處江湖負耒林丘下容非隱者徒

吳江

吳城帶秋水盈盈笠澤湄西風一夜起鴻雁盡南飛
晉日東曹掾唐朝左拾遺長揖謝軒冕悠悠千載期

垂虹橋

出郭雨如注入舟天欲低飛梁跨雲渚帶嶼亘長霓
三江風水急五湖烟月迷夙昔鷗夷子扁舟此入齊

平望

下田不憂旱高田正宜雨四野已足霖三吳復無暑
盃酒及豚蹄盤羞雜雞黍伐鼓樂社翁燒燈祀田祖

嘉禾

鬱鬱由拳縣亭亭檇李城秦漢相吞噬吳越競戈兵
靡靡風露夕離離禾黍生千古陸夫子遺書昭日星

石門

迢迢石門路冉冉烟樹暮渺渺棹歌聲泠泠不知處
水宿畏風波宵征犯霜露自愧匪賢勞何由拯黎庶

崇德

崇德據四衝城郭開蒼莽水陸飛粟芻軒車遞搖蕩民
和州牧賢雨足禾苗長我欲艤小舸相尋慰企想

長安

上堰如上山下堰如下陵躋攀劇分寸旁皇如戰兢有
形必有役無寵自無驚為謝津頭吏誰是魯連生


題蘇昌齡西澗圖乃黃子久所畫者子久自識

云華陽逋客作

逍遙西澗翁汗漫華陽客渴飲杖頭瓢醉卧溪邊石澄
觀無聲意默然寧有迹目送雲鳥飛側耳川流激人籟
靜逾聞天機動彌寂冥搜屬意匠繪寫嫌刻畫此客不
可作斯翁老無敵寤寐西澗圖令人心莫逆

題黃侍講所著王友樵先生墓銘後

隱君千古士太史百世師刻辭銘友樵其言玉無疵我
觀讀騷作古道殊未頽斯人不可見斯文其永垂



夷白齋稿卷四

欽定四庫全書

集部

夷白齋稿卷五至

十

詳校官中書_臣孫衡

中書_臣劉源溥覆勘

總校官編修_臣王燕緒

校對官待詩_臣胡士震

謄錄監生_臣令狐慕蜀

欽定四庫全書

夷白齋稿卷五

古詩七言

楚州舊將歌

楚州舊將守楚城身與羣凶殊死爭
父母遭烹妻子戮終天之恨何時平
近領正師却征楚泣尋父母身死所
忍疼刺血滴枯骨觸髓無言淚如雨
烹父之卒今尚存

元 陳基 撰

恐懼復讐前自陳將軍慰卒汝勿畏我志為國非為親
羣凶所重在其首汝輩區區復何有若令殲侈止渠魁
親骨有知當速朽將軍將軍孝且忠天地有盡悲無窮
吾聞古有王陵母仗劍殺身成漢功

東臯隱者詩為范思賢作

錢塘隱者東臯子讀書賣藥青門裏云是先朝防禦孫
至今住近蒲橋市蒲橋東頭楊柳青門前好山終日橫
承家善起小兒疾好古不求當世名韓康之後誰流亞

宋清已矣無來者世上如今市道人紛紛見彈思鴉炙
眼明有此東臯生百年義重黃金輕江湖放浪詩千首
風月徘徊鶴一聲顧余亦是忘機客買藥青門始相識
為君長嘯上東臯極目千峰倚空碧

次韻玉山唱和詩

東方日出浴咸池夸父隨之死不歸彼仙之人列與莊
寓言非寓狂非狂維南有箕不簸揚此語在詩理不與
彼幻乃爾為詩張鳳凰飄飄千仞翔虱也蠢蠢獨處禡

秋風八月霜露涼芙蓉始花水滿塘美人贈我明月璫
何以報之白玉觴舉觴浩飲意氣揚出門一笑江泱泱
人言名教樂未央明哲所貴惟守常安用策勛封醉鄉
我聞夏殷時聖亦師務光宓子乃得友鳴琴不下堂人
生莫歎居無倚林宗乃為叔度留李膺亦復同仙舟平
生癡絕顧虎頭我歌此曲君聽否為君更賦逍遙游

次韻垂虹橋泊舟唱和

何年伐石駕危橋鯨浪翻江白雨颼勢跨三吳虹倒影

氣吞七澤水通湖重淵有怪犀難照蔓草無根火不燒
霸國黃金聞鑄像侯門白玉想為標功成海上身先退
膾熟江東興可邀歲月幾何流水逝山川如舊古人遙
鴻飛增緜何由篡鶴去樊籠不可招浩蕩扁舟歸鑑曲
寂寥方丈似中條越人尚以雞為卜楚俗相傳鵬類梟
自把文章論倚仗敢將交態較淳澆五湖烟景隨時異
萬里風萍觸處飄却憶春暉樓上坐為君裁取玉為簫

分題賦得太湖送鄭同夫

朝飲太湖水暮詠太湖秋太湖三萬六千頃七十二峰
居上頭上稟咸池五車氣下沒日月涵斗牛鷓夷之舟
從此逝功成身退與天游聲名千載齊伊周江東步兵
輕冕旒長揖齊王反故邱萼羹鱸膾何足羨上與造物
同虛浮唐家拾遺粟許流躬耕湖上食杞菊不與濁世
爭浮漚三人之生不並世出處雖異心則侔至今血食
太湖口上下雲氣乘蒼虬君今暫別太湖渚鼓枻三高
祠下路借得龍威一席風送君彭蠡湖頭去

送毛生還越

昔人受易田王孫孟喜梁邱同一門卓哉古學貴師授
愛爾毛生敏而秀侍父宦游千里外從師問業三冬後
越王臺上瞰滄溟百川趨之終不盈毛生東歸究源委
親見陽烏海底生

織錦篇

絡緯秋吟金井根佳人當窓織鳳麟流雲拂拭春無痕
頃刻繡作鴛鴦文銀漢含風星斗搖虛空迸出黃盤鵝

為君裁就宮錦袍
奪取當年盧肇標
妾家本任牽牛渚
與君締結同心縷
人間乃多離別苦
夢落陽臺不雲雨
斷腸無心為君織
向君拋却支機石
何時頭戴蓮花巾
相伴雙成禮白雲

青絲絡馬頭送李彥章

青絲絡馬頭
游宦古蘇州
蘇州城東萬斛舟
前年運米直沽口
送別江頭折楊柳
承恩頭挿上陽花
賜宴尊傾光祿酒
江上今年楊柳黃
辟書千里有輝光
勇騎閩外

將軍馬飽敵圍中
荔子漿園中女兒歌
白苧把杯勸君
為君舞將軍好文不好武
自古園中稱樂土

送李景先錄判

古吳柳枝短君行不可緩
贈君不折楊柳枝
勸君滿飲
金屈卮
丈夫將身誓許國
何用當歌傷別為青絲
絡鞵
黃金勒游宦鄱陽山水色
何處春風追憶君
琵琶洲上
縈蕪碧

送姪讓還吳

西風蕭蕭鴻雁鳴游子悠悠隨旆旌百年衣食事奔走
四海甲戈紛戰爭猥將筆札事卿相叨贊戎行陪俊英
軍中草檄我何有馬上操觚汝所能人稱阿買八分好
我愛永興書法精我女呬唔學言語汝兒讀書知姓名
中年竊祿恥為此家有南畝歸力耕汝今還家我羈旅
各勸加食慎寢興升堂再拜謁從母兒妹忻忻趨走迎
扁舟石湖上先攏霜露既降草木零丁寧為我戒樵牧
慎勿剪傷松柏青我欲還山結茅屋五岳逍遙期向平

乞身時宰若未許南望白雲搖心旌

謝從義叅軍自京師還言中書危叅政見問且

訝無書因述詩寄謝

叅軍過我夷白庵為言廊廟高巖巖故人誰為國柱石
臨川先生危大叅猥蒙問及且見訝十載尺書無一緘
憶昔相從客燕趙削去涯崖無猜嫌辱陪五更佐三老
勸講六經陳二南御史不容丞相忌司隸側目官臣讒
脫身黨籍走吳楚托跡丘園訪孔聃孰知展禽三見黜

自揣嵇康七不堪平生不諳佩刀劍晚歲強令聞韜鈴
驛消怕騎將軍馬面皴羞看從事衫折衝師旅非夙習
奔走周旋真可慚危言深畏速官謗微祿不逮供親甘
慰情屢抱盤絲女與國未有添丁男胡為長年在道路
席不暇暖突不黔幾回乞身向藩省未許曝背歸茅簷
終當解紱謝寮友亟歸結屋依山嵐鄙夫出處蓋如此
為報先生聊口占先生事業則異是論道經邦民具瞻
早令四海偃兵甲盡遣百姓趨耕蠶時和歲稔我所願

功成身退公自諳他年若訪赤松子一笑相逢忻執鞭
孟冬觀淮水

孟冬日日東風狂長淮風與水爭強層濤如山勢欲立
怒潮逆上相顛顛大舟亂流流轉急人馬股栗駭且僵
篙師掀舵誇老手迎風簸浪抑復揚小舟徑渡矜勇捷
翩如一葉凌空翔須臾掀舞浪花裏洄瀾百折爭低昂
我聞夏后分四瀆百川分職皆循良邇來洪河恣跋扈
清濁混淆隳舊防昨者王師搃淮口坐制鯨鯢如犬羊

天吳罔象不敢動河失故道誰之殃漢武當年塞瓢子
勞民兆亂紛搶攘中原黎庶化魚鼈至今千里無禾桑
我欲訴帝勅河伯使復故道安其常清者自清濁者濁
勿違約束於明章不然帝怒速致討河伯正罪誰嗟傷
鄭遂昌以趙魏公所題高尚書畫遺沈東林要

予賦詩

高侯高侯畫無敵魏公之書不易得半幅冰紈僅盈尺
千年老幹化虬龍氣挾太陰雷雨黑彼美幽篁尤正直

挺身故有千鈞力赤松子孤竹君鄙夫與爾情最親道
遙歲晚東林下杖策相從鄭子真

題五王游春圖

五王坊宅五雲中天仗時來駐六龍君王敦厚家人禮
兄弟相宜友愛隆每日朝回從飲博今日何為廢游樂
曲江池上杜陵南花氣蒸人柳陰薄天子無為四海寧
梨園歌曲教新聲救時宰相方憂此誤國奸邪計已萌
當年若寶千秋鏡友愛如初無嬖倖只緣聲色惑移人

萬里蒙塵蜀山頌一幅丹青感慨多開元事業竟如何
自古晏安為鴆毒至今荆棘歎銅駝

題馬都事壽椿堂

堂前古椿樹問年不知數葉葉庇芝蘭枝枝承雨露楚
南之種昔同根淮海移栽子復孫共持春酒為親壽但
願親年如此椿椿陰滿地休教掃留與年年陰萱草

夷白齋稿卷五

欽定四庫全書

夷白齋稿卷六

元 陳基 撰

古詩雜興

沈孝子行送醫師沈伯新

吳淞江來自天目山奔流到海無時窮川原藪澤似碁
布雞鳴犬吠俗與太古同郡人沈孝子築室居其中辛
勤自食已之力仰事祖母年九十白髮黃齒顏如童日

出入田省耕作日入歸家奉溫清一室之內慈孝敬愛
究有齊魯風暇日閉戶讀書史閨門上下咸肅雍省身
齋戒喜且懼飲膳湯藥必先嘗此心自可對昊穹至正
十年夏六月祖母嬰疾卧床蓐涕泣側息憂忡忡再拜
虔迎伯新甫醫歷三世術甚工新甫診脉不用藥時進
陳黍甘如飴以意取效趨庸工起居飲食復如故神術
陰與孝感通壽為五福首孝乃百行宗醫師治藥餌為
人恤痲痾吾聞孝子世積德慈愛固自天所鍾如何俞

扁去已久世上復有太倉公我歌孝子行送去勿勿勿
但願人皆躋壽域樂有孝子心融融嗚呼樂有孝子心

融融

煮雪窩為玉山作

草堂之仙人隱居玉山陸平生盜泉不肯飲惡木不肯
棲就山為窩受山雪雪勝玉泉茶勝芝煮以菌蟲彭亨
之石鼎然以蹙縮擁腫之枯枝恍聞松風洶湧出澗壑
化作雲氣菊鬱干虹霓匡廬道士來會稽嬉笑怒罵皆

成詩尋常一飲恒一石
蹋破甕中天地皆醞雞
不厭陶家滋味薄
却愛玉山文字奇
舉椀猛吸如渴鯢
快哉相對忘賓主
富中自來無町畦
乃知混沌鑿不破
縱使先天之子亦莫窺
端倪笑殺逍遙南華老
夢與蝴蝶隨春迷

我今有所思寄于山人

我今有所思乃在越山陞
越山遙遙青入海
秦望特起上與浮雲齊
容有匡廬虛白子
一如吳門歸會稽
口誦

黃庭經頭戴白接羅往來閃忽莫可知上下風雲鞭虹
霓仰叅赤松子俯迓青牛師左手揖盧敖右手招安期
醉援北斗吸滄海長嘯濯足脫巾掛在扶桑枝我嘗過
之玉山下要我八極同游嬉塵緣未割妻孥累一去不
得相追隨天台仙人馬子微陽明洞天曾見之貽書遠
報雪巢子烟波萬里來無時扁舟我欲東南歸鑑湖之
水清漣漪授子玉匱書茹子苗山芝逍遙廣漠超希夷
翩然却笑賀狂客為誰白首居鴻禧

空明山人歌

丹丘子空明生結髮為吏于公卿懸河之口縱且橫法
家之筆刑與名少年策轡入公府白首全真歸赤城赤
城仙人下青冥手奉寶籙遙相迎虛皇勅治委羽洞服
事劉郎為弟兄劉郎乘風朝紫宸雲為旂兮霓為旌留
與瑤田惟種玉約以不死八千春八千春在何許來往
東吳復西楚請看珠樹著三花答鳳鞭龍却輕舉

烏夜啼引

閩人王畹為淮東元帥府奏差被誣繫獄部
使者使秦州尹趙子威鞠之平反其冤

烏夜啼在庭樹烏啼啞啞天欲曙阿兒被誣身繫獄盡
室含冤受荼毒烏啼胡為統我屋下堂喚婦起聽烏忽
傳淮東兒有書書中報喜兒罪脫此樂忻忻天下無兒
歸拜母為母說秦州使君當世杰執法霜臺舊司臬明
如青天皎如月冤獄平反解縲紲死地得生誣得雪海
可枯山可裂使君之德不可滅烏啼愛我庭樹枝我愛

使君君不知使君還朝覲天子日日聽烏為君喜

玉笙引

金華仙人問子期能吹三十六宮之參差
疏音間節傳自女媧氏上引浮丘公下接王子晉
來往伊水之濱雍水湄緜氏山頭雜宮徵龍吟
鳳噓能使鬼神上下莫得窺端倪昔年西王母
翩翩會瑤池親遣侍女董雙成學得妙曲崑丘
歸至今縹緲十二之玉城餘音長繞蟠桃琪樹
枝請君休汗漫我欲與爾期若非鈞天即洞庭
仰

叅軒轅帝俯友虞廷夔後天而老不死長追隨周子奇
此曲休向人間吹

律詩五言

興福院會秦文仲學古

蘭若臨江次層城壯海堦地通重譯貢門泊孝廉船人
事桑田後春光穀雨前未忘棲遯跡來此欲逃禪

其二

兵革艱虞際思君減帶圍折衝成俎豆贊畫佐樞機交

義雷陳古功名管晏微
江城花爛熳莫惜典春衣

送謝忝軍

忝軍趨府日父老惜恂時重為蒼生起
當酬國士知功名若不忝筋力我將衰
送別春城暮深杯莫厭持

次韻答元善

跡忝芙蓉幕心依虎豹關
老驚詩鬢短貧覺酒尊慳
特達高書記清新庾子山
多情惡塞雁時寄一書還

送鉤治中

楚楚平津彥翩翩千里駒起家忝上郡振轡騁康衢別
駕恩非忝嚴君德不孤青雲有知己寧許戀南湖

二月十二常熟阻雨寄吳門分省同官

一棹琴川路頻年此往還海風寒挾雨戍火夜連山澤
國龍分節邊城虎據關故人南省幕退食珮珊珊

琴州懷古

揖讓思虞仲絃歌憶子游學文須到魯議禮必宗周俎
豆今如此干戈苦未休慚非割雞手安敢話屠牛

解維值北風大作復泊北門

風急江難渡春寒雪更飄
濟川雖有楫跨海恨無橋
使節辭吳近官軍去楚遙
北門仍繫纜山雨夜蕭蕭

渡江

渡江風日好掛席近扶桑
萬古天為塹中流葦可航
導川思夏后誇海說秦皇
跋涉艱危地低頭愧孟光

三塔寺訪寬長老

人世難行路禪房獨掩扉
鶴飛知客至雨歇見龍歸
天

地干戈滿江湖故舊稀愧非韓刺史臨別更留衣

訪本覺不遇時公在南堂退居

來訪南堂老扁舟興盡還耳聾猶說法地僻漫投閒掃
竹逢春雨開門見遠山題詩託端叟為報鬢毛斑

留別仲銘

南國新開士前身体上人賦詩隨鮑謝揮翰擬梁陳雨
歇水西寺花飛初外春相逢又相別離思滿江津

其二

方外碧雲向人間白雪歌江湖相見少塵世別離多水
宿隨鳧雁巖樓倚薜蘿何當謀一壑老我共婆娑

送讓侄從軍武安

送爾徐州去秋風幾日程水通彭子國山擁楚王城虎
帳氍毹暖犀船五兩輕從軍古云樂今我不勝情

其二

世亂難為別他鄉復暮秋愧余叨入幕念爾獨登舟季
子裘空敝班生筆漫投恨無田負郭歸老石湖頭



夷白齋稿卷六

欽定四庫全書

夷白齋稿卷七

元 陳基 撰

律詩七言

秋日雜興

彈鋏歸來歎薄游，西風吹老黑貂裘。
裁詩自慰慚錢起，掃榻相延愧隱侯。
擬學楚人歸種菊，虛勞蜀客望牽牛。
五湖烟景依然在，可許扁舟伴白鷗。

其二

關山迢遞雁飛遲
江漢飄零有所思
倦客自憐蘇季子
故人誰問介之推
露催絡緯窓間織
風緝蠨蛸戶外絲
獨憶慈親念游子
倚門日日數歸期

其三

江頭久客日思家
坐覺清霜上鬢華
節序又催秋後雁
風光爭發雨前花
倦游每夢莊生蝶
不飲何憂廣客蛇
怪底朝來衣袖薄
一天白露下蒹葭

其四

一夕西風木葉飛
畫梁落月淡餘暉
銀燈夜照還家夢
金剪親裁寄遠衣
霜信早隨新雁至
素書深訝故人稀
無因為謝東曹椽
鱸熟蓴香莫便歸

其五

明河如練月娟娟
坐對清光只自憐
夜久不知沾白露
夢回猶憶到鈞天
汝南遺老推黃憲
海內諸公想鄭虔
萬里歸來無寸補
論文慚愧到忘年

寄沈仲說

欲采芙蓉寄所思，秋江風露正離離。
每因見月懷玄度，豈但看詩說項斯。
溪上燕辭華屋早，槎頭魚上碧波遲。
太平無事差科了，歸共原泉理釣絲。

其二

野人籬落並江濱，竹裏流泉竹外雲。
好學橐駝惟種樹，莫誇司馬最能文。
小橋斜接漁樵路，落日爭呼雁鷺羣。
却憶詠歸亭上客，久留城府思紛紛。

次韻金上人見訪

屏跡吳淞江水頭，勞君歲晚遠相求。
擬為葛井三生夢，更作曹溪一宿留。
掛錫好依黃葉寺，題詩曾到白蘋洲。
他年重約吳門道，杯渡秋風不用舟。

寄家兄敬德

庭闈一月離溫清，兄弟終年歎化離。
落日有時成獨立，秋江無處不相思。
雲邊白雁初傳信，籬下黃花預有期。
甚欲卜居依此郭，故人誰送草堂資。

次呂彥貞韻

西池風日何瀟灑公子不來誰共游
漁唱樵歌時斷續湖光山色互沈浮
經秋華屋辭飛燕隔水好花憐暮愁
腸斷濯纓亭下路羅傍猶繫野人舟

歸燕

年年此日便知歸欲去仍依舊壘飛
故國定知通碧海秋風應不到烏衣
吳宮避火鷺前夢衛幕巢營悟昔非
莫笑野人門巷小杏花春雨得泥肥

用秋日雜興韻作游仙詩

飛佩影影入遠游青藜為杖鹿為裘采芝歌逐秦遺老
辟穀心期漢列侯又見秋風歸乙鳥幾看春雨戰蝸牛
有時濯足溪頭晚一曲滄浪不動鷗

其二

幽泉怪石好棲遲鐘鼎無勞入夢思每把素書閒裏讀
細將玄牝靜中推溪頭斫竹栽龍窟石上栽松引兔絲
去與盧敖同汗漫十洲三島共君期

其三

鵬鷃高低各自飛
龍泉何必吐光輝
三株樹下曾食玉
千仞崗頭好振衣
抱積書存人見少
崑崙桃熟客偷希
仙家不是無樓觀
底事公孫不肯歸

其四

中宮姹女最嬋娟
何意東君不見憐
貞潔正同秋後月
澄清直似水中天
每持玉節朝羣帝
自掃丹臺揭寸虔
臣妾自知無所覲
願君安樂壽千年

其五

白雲深護地仙家，千樹紛琪老歲華。
羽客穿林收桂實，山童和露采松花。
烟敷瑤草柔如髮，石走蒼藤曲似蛇。
記得夜來歸路險，翻江風浪撼秋崖。

寄玉山

江上秋陰日漸多，思君不見奈愁何。
風高澤國來鴻雁，雨入汀洲落芰荷。
公子文章裁瑞錦，美人衣袖剪輕羅。
畫船欲棹溪頭去，聽唱花間緩緩歌。

次鄭遂昌韻奉謁范魏公祠

皇皇卷服儼專祠生氣渾如未死時
天下功名韓相並關西威烈夏人知
英雄未盡匡君策父老忻瞻出牧旗
昭代尚賢嚴祀典野人聊得薦江蘿

白芙蓉

生嗔青女太精神玉立西風不受塵
秋水洗粧朝白帝露盤和淚泣銅人
清涵漢武池中影淡寫崔徽鏡裏真
腸斷深宮舊時侶年年相望月溪濱

次韻錢伯行白芙蓉

帝子西游太液池一杯秋露為君持空令越女羞容貌
不與唐昌共本支姪婉最憐無語處風流全在半開時
自移長信宮中去學得班娘淡畫眉

婁江即事簡二三知己

婁江江上樓居好滄海海頭城邑新蠻郎打鼓爭起柁
鮫客捧珠欲售人風燈照人不數點露月湧波才一輪
人生會合豈易得看劍引杯寧厭頻

其二

秋風已過菊花期
笑把婁東酒一巵
徘徊月色樓中滿
顛倒天光水底移
夢熟已知鼈背穩
詩成偏憶虎頭癡
明朝又鼓吳淞棹
應采芙蓉寄所思

次仲說韻喜陳叔方過東林隱居

州府尋常數往回
江湖相見重徘徊
殺雞不為林宗至
拜母曾期范叔來
烏烏暮棲池上樹
兒童晴掃竹間苔
明朝又入城闔去
一幅蒲帆帶雨開

其二

空林風日變陰晴扶策相從款款行心戀白雲飛處近
眼隨孤鳥沒邊明敢希諸葛隆中卧且學龐公壟上耕
老覺丈人才力健浩歌一曲大江橫

次遂昌韻喜雪簡白野監司

瓊英着地不沾塵玉樹臨風欲照人千古賦高粱苑調
一枝梅冠漢宮春占年已喜無時癘祈穀何須拜水神
却憶上番裁詔處瑤堦飛絮絮于銀

其二

澤國雲同氣若蒸賦成應不為憎蠅花開端木皆為瑞
露滴金莖欲化水甲觀影搖鳩鵲樹銀牀聲斷轆轤繩
懸知水部明于晝錯認瑤臺皓月升

送曹宗爰

愛此丹丘五色毛綵衣初剪映山桃奉親喜有銀絲鱠
贈容慚無金錯刀洲渚春深生杜若江湖波暖漲蒲萄
王褒擬奏賢臣頌肯學山人索價高

次韻懷彥成

沙棠為檣木蘭橈別後令人瘦沈腰米戢暫歸靈越去
栽桃重赴武陵邀醉來蓮葉春波濶夢落簷花夜雨飄
猶記共游鳴玉洞滿山明月共吹簫

待琦上人不至

羨君方外邁詩流飛錫相從海上游白鶴一聲寥廓晚
滄波千頃洞庭秋鹿門未遂龐公隱蓮社欣逢慧老留
望望佳人何不至碧雲迢遞迥添愁

次韻懷玉山

滑滑春泥滿郡城出門策馬不堪行未能學道從緜母
且自忘憂對麴生流水小池垂釣影春風深巷賣花聲
停雲賦罷心如渴安得滄浪濯我纓

陸氏別業

窈窕西池一徑通赤闌如畫倚晴空風微燕雀飛塵外
日皎龜魚在鏡中入谷漫誇盤復往卜鄰宜住灤西東
綠陰滿地新荷發猶勝開尊勸碧筒

寄仲說

自昔龐公少入州，偶因人事亦綢繆。
慈烏舊止庭前樹，拱木新悲壠上秋。
雨露山空驚物候，江湖風急滯傳郵。
此心酷似長庚月，永夜相思炯不收。

寄玉山

我愛玉山佳樹林，草堂終歲有餘陰。
巢安翡翠春雲暖，窓護芭蕉夜雨深。
寶篆焚香留睡鴨，綵箋行墨寫鳴禽。
萬竿修竹休教洗，日日平安報好音。

其二

碧梧翠竹日扶蘇
長夏高堂可燕居
雪上故人時載酒
山陰道士每傳書
蒼頭掃石安棋局
稚子穿花奉板輿
若見惠休煩問訊
碧雲詩句近何如

水木清華亭小酌

柳陰門巷雨初晴
蓮葉田田徧渚生
濁酒且澆嵇叔夜
名詩不讓米嘉榮
波紋瑩透微風起
霞采紅兼落日明
水木清華賓主勝
莫孤詩社舊時盟

仲說留陳公原余往訪之

孝子之廬何處覓陳公原上白雲深
山林不受炎歊氣
雨露能生怵惕心
流水到城無二里
喬松出屋有千尋
蓼莪自著多遺恨
三復令人淚滿襟

留宿陳公原

五月城東訪隱淪
衡門草榻與僧鄰
長林爭宿此山鳥
短棹獨歸何處人
松蘿繞屋月當戶
楊柳夾溪風滿津
杖策從今來往熟
草堂猿鶴未應嗔

金... 卷七

題陳公原壁

忽喜美人來碧山松桂滿庭幽且閒論心合在羲軒上
浪迹漫居夷惠間夜雨思親雲氣白秋風泣血土華殷
歲寒有約從諸老採藥攜棋日往還

夷白齋稿卷七